

आकाशवाणी जयपुर-अजमेर
प्रादेशिक समाचार

- देश मांय तीन नुवा आपराधिक कानून लागू व्ह्या- केन्द्रीय गृह मंत्री अमित शाह कह्यो- नुवा कानून बेगो न्याय अर पीड़ित जनता रा हक तय करेला।
- प्रदेश मांय आज स्टॉप डायरिया अर आंगनबाडी चलो अभियान सरू व्ह्या।
- राष्ट्रीय परीक्षा एजेंसी- एनटीए नीट यू.जी. सारू ओजू लिया ज्या इम्तेहान पाछे नुवा नतीजा रो ऐलाण कीनो।

अर

- प्रदेश मांय केई ठोडां बिरखा रा समाचार।

000

तीन नुवा आपराधिक कानून आज लागू व्हे गया। भारतीय दण्ड संहिता 1860 री ठौड़ भारतीय न्याय संहिता 2023 , भारतीय आपराधिक संहिता 1973 री ठौड़ भारतीय नागरिक सुरक्षा संहिता 2023 अर भारतीय साक्ष्य अधिनियम 1872 री ठौड़ भारतीय साक्ष्य अधिनियम 2023 लागू व्हे गयी है। आं कानूनां रा बारा मांय नई दिल्ली मांय खबरनवीसां ने जाणकारी देता थकां केंद्रीय गृह मंत्री अमित शाह कह्यो के आज लागू व्ह्या तीन नुवा आपराधिक कानूनां ऊं देश मांय सब ऊं नुवी आपराधिक न्याय प्रणाली चालेला। वे कह्यो के नुवा कानून तुरत न्याय अर पीड़ित लोगां रा हक तय करेला। गृह मंत्री कह्यो के सरकार देश रे खिलाफ काम करण रा वाक्यां ने रोकण सारू राजद्रोह कानून खत्म कर र नुवा प्रावधान लागू कीना है।

ई मौके मुख्यमंत्री भजनलाल शर्मा कह्यो के नुवा कानून लागू व्हेवण ऊं न्याय आसानी ऊं मिल सकेला अर पीड़ित जनता ने टेमसर न्याय मिल सकेला। वे देश मांय तीन नुवा आपराधिक कानून लागू व्हेवण रे मौके वीडियो कॉन्फ्रेंस रे मार्फत राखी ज्यी मीटिंग मांय बोल रह्या हा। नुवा कानूनां री नुवी धारावां रा तहत राज्य मांय दौसा जिला मांय पहलो मामलो दर्ज करी ज्यो है। दौसा री एस.पी. रंजीता शर्मा बतायो के नुवा आपराधिक कानूनां रा तहत जिला रा लालसोट थाणा मांय एक महिला ओ मामलो दर्ज करायो।

पाली मांय पुलिस वाळां अर सुरक्षा सखियां ने पैम्पलेट अर पोस्टर बांटी ज्या। आई. जी. ओमप्रकाश मेघवाल बतायो के नुवा कानूनां रा बारा मांय जाणकारी सारू राज्य ,रेंज अर जिला स्तर माथे हेल्प डेस्क बणायी ज्यी है।

0000

प्रदेश मांय दस्त ऊं जुडी बीमारियां री रोकथाम सारू आज स्टॉप डायरिया अभियान सरू करी ज्यो। 31 अगस्त ताई चालण वाळा ई अभियान रा तैत आशा कार्यकर्ता घर-घर जा र 5 साल उम्र ताई रा बच्चां ने दस्त ऊं बचाव सारू ओ.आर.एस. रा पुडका अर जिक री गोळिया देवेला। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह आ जाणकारी दीनी। वे बतायो के सगळा सरकारी अस्पतालां अर आंगनबाडी केन्द्रां माथे ओआरएस जिक कॉर्नर चलाया जावेला, जठे दस्त ऊं बचाव अर ईलाज रा बारा मांय जाणकारी दी जावेला। ध्यानजोग है के मुख्यमंत्री भजनलाल शर्मा काल 'स्टॉप डायरिया अभियान' समेत 'राष्ट्रीय पल्स पोलियो अभियान' अर आयुष्मान भारत डिजिटल मिशन रा तहत 'आभा आईडी बनाओ' अभियान री सरूआत ई कीनी ही। पल्स पोलियो अभियान रा पहला दिन आखा राज्य मांय पोलियो बूथां माथे पांच साल उम्र ताई रा बच्चां ने पोलियो ऊं बचाव री दवाई री खुराक पायी ज्यी, जो बच्चा काल आ दवाई नी पी सक्या, वां ने स्वास्थ्यकर्मी आज घर-घर जा र दवा पाई। काल ई घर-घर जा र दवा पाई जावेला। जैसलमेर रा शहरी प्राथमिक स्वास्थ्य केन्द्र गफूर भट्टा मांय स्टॉप डायरिया अभियान रा तहत 5 साल ताई रा बच्चां ने ओआरएस रा पुडका मुफ्त बांटी ज्या।

00000

राज्य मांय आज ई आंगनबाडी चलो अभियान सरू करी ज्यो। 15 जुलाई ताई चालण वाळा ई अभियान रो मकसद 3 ऊं 6 साल ताई उम्र रा बच्चां ने आंगनबाडी केन्द्रां ऊं जोडणो है। महिला अर बाल विकास विभाग रा शासन सचिव डॉ. मोहनलाल यादव आ जाणकारी दीनी। वे बतायो के आंगनबाडी केन्द्रां माथे 3 ऊं 6 साल ताई रा बच्चां ने स्कूल ऊं पैली री सीख रा तहत खेल-खेल मांय सीख, पौष्टिक आहार अर स्वास्थ्य जांच सरीखा सुबीता मुहैया कराया जा रह्या है।

00000

राज्य री 9 हजार 325 ग्राम पंचायतां मांय आज 'टीबी मुक्त ग्राम पंचायत अभियान' रो तीजो दौर सरू करी ज्यो। चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह आ जाणकारी दीनी। वे बतायो के लारला साल ओ अभियान 7 हजार 700 ग्राम पंचायतां मांय चलायी ज्यो हो। आं मांय ऊं 622 ग्राम पंचायतां रे केन्द्र सरकार "टीबी मुक्त पंचायत" व्हेवण रो ऐलाण कीनो है। वे बतायो के राज्य ने साल 2025 ताई टीबी मुक्त प्रदेश बणावण सारू चिकित्सा विभाग 31 मार्च 2025 ताई ओ अभियान चलावेला। अभियान रे दौरान आशा अर स्वास्थ्य कार्यकर्ता साल मांय दो दफ़ा घर-घर जा र टीबी रा मरीजां री ठा करेला।

000

राष्ट्रीय चिकित्सक दिवस रे मौके आज राज्य रा न्यारा-न्यारा सरकारी अस्पतालां मांय चिकित्सा विभाग री ओर ऊं 'वृक्षारोपण अभियान' सरू करी ज्यो। 31 जुलाई ताई चालण वाळा ई अभियान रा तहत राज्य रा अस्पतालां मांय करीब एक लाख पौधा लगाया जावेला। चिकित्सा विभाग री अतिरिक्त मुख्य सचिव शुभ्रा सिंह बतायो के सरकारी अस्पतालां मांय बेहतर वातावरण, हरियाली अर छाया सारू सामुदायिक स्वास्थ्य केन्द्र अर इण ऊं नीचला स्तर रा अस्पतालां मांय 5 अर इण ऊं मोटा अस्पतालां मांय 10-10 फलदार अर छायादार पौधा लगाया जावेला। ई मौके आज प्रदेश रा न्यारा-न्यारा जिलां मांय ई कार्यक्रम राखी ज्या। बूंदी मांय इण्डियन रेडक्रॉस सोसायटी री ओर ऊं

डॉक्टरां रो स्मृति चिन्ह दे र मान करी ज्यो। अलवर जिला अस्पताल अर नसीराबाद मांय गैर सरकारी संस्थावां री ओर ऊं खूनदान शिविर लगायी ज्यो। पाली रा राजकीय बांगड़ अस्पताल मांय डॉक्टर खून दान कीनो। जिला रा देसूरी हलका रा रणकपुर मांय ई डॉक्टर खून दान कीनो। **बांसवाड़ा** मांय स्वास्थ्य विभाग रा दफ्तर मांय पौधा रोपण रो अभियान सरु करी ज्यो। आज ई सी ए डे ई मनाई ज्यो। ई मौके प्रधानमंत्री नरेन्द्र मोदी चार्टर्ड अकाउंटेंट पेशेवरां ने बधाई दीनी है।

00000

राज्यपाल कलराज मिश्र जनजातीय हलकां मांय नौजवानां ने नौकरी धंधा मुहैया करावण सारु भणाई—लिखाई रा नुवा तरीका काम लेवण सारु कह्यो है। वे आज गोविंद गुरु जनजातीय विश्वविद्यालय रा स्थापना दिवस रे मौके राखी ज्या कार्यक्रम मांय जयपुर रा राजभवन ऊं ऑनलाइन तरीका ऊं बोल रह्या हा। वे जनजातीय हलकां री विषमता अर विसंगतियां दूर करण सारु जनजाति विद्यार्थियां ने मजबूत अर माली तौर ऊं खुद रे पाण ऊबा करण बाबत् काम करण सारु कह्यो। ई मौके राज्यपाल विश्वविद्यालय मांय बणायी ज्या सभागार, गुलाब वाटिका अर कैटीन ने ऑनलाइन तरीका ऊं जणता ने सूंप्या।

0000

राष्ट्रीय परीक्षा एजेंसी – एनटीए नीट यू.जी. सारु ओजू लिया ज्या इम्तेहान पाछे आज एक हजार 563 विद्यार्थियां रा नुवा नतीजा रो ऐलाण कर दीनो। ई पाछे एनटीए सगळा परीक्षार्थियां री रैंक मांय बदलाव कीनो है। नुवा स्कोर कार्ड एनटीए री वेबसाइट माथे देख्या जा सके है।

0000

करौली जिला मांय करौली—मंडरायल गेला माथे ससेड़ी गांव कने एक बोलेरो अर ट्रक मांय व्ही टक्कर ऊं बोलेरो मांय सवार सात जणां री मौके ही मौत व्हे गयी। मरण वाळां मांय तीन महिलावां अर चार पुरुष शामिल है। हादसा मांय घणा ज़ख्मी व्हा लोगां ने जिला अस्पताल मांय भर्ती करायी ज्या है।

0000

प्रदेश मांय केई ठोड़ां चोखी बिरखा व्ही है। मौसम विभाग ऊं मिली जाणकारी रे मुजब बांसवाड़ा जिला रा घाटोल मांय सब ऊं बत्ती 8 सेंटीमीटर बारिश दर्ज करी ज्यी। दानपुर, रानीवाड़ा, चूरु अर देवगढ़ मांय 7—7 अर गोगुन्दा, पीपलखूंट, चौथ का बरवाड़ा, बेगूं अर भीलवाड़ा कने गंगापुर मांय 5—5 सेंटीमीटर पाणी बरस्यो। हनुमानगढ़ अर श्रीगंगानगर मांय ई तेज बिरखा व्ही। जयपुर मांय रात ऊं सरु व्ही बिरखा आज दोपहरां ताई चालती रही। बिरखा सरु व्हेता ई माउंट आबू मांय सैलानी पूगण लाग्या है। म्हाणा खबरनवीस बतायो के मौसम रो मजो लेवण सारु देश रा न्यारा—न्यारा हलका ऊं सैलानी माउंट आबू पूग रह्या है।

चौमासा री बिरखा सरु व्हेवण सागे ई घणखर ठोड़ां काश्तकार साखां री बुवाई सरु कर दीनी है। जैसलमेर अर सवाईमाधोपुर समेत केई ठोड़ां वन विभाग अर जनता री ओर ऊं पौधा रोप्या जा रह्या है।

0000